

## इफसियों के नाम पौलुस प्रेरति की पत्री इफसिगोळ हेसुर पौलुस प्रेरति उन चट्ठी परचिय

मसीह अन जनम इन साठ वर्ष पयले इफसिगोळ चट्ठी अदकि कुलुससगोळ चट्ठी लगभग सांगुळ लखिसकु आगीत.

प्रेरति पौलुस ईद सुचति माळतान कि आवा चट्ठी इन लेखक हुन १:१ कुलुससगोळ चट्ठी इन घाई ईद चट्ठी दा व्यक्तत्व शुभेच्छा नोळकु आगाल. तरी भी ज्यादा तर वधिवानगोळ ईद मानसतार कि पौलुस अच ईद चट्ठी लखिसीदान. ईदा कारण प्रांत इन अलग अलग मंडली दा ईद चट्ठी तरिगुसकु वाचुसकु आगुल हगि पौलुस उन ईरादा आग सकतद, याग आव ईद चट्ठी लखिसदुन आग पौलुस ईद हेळतान कि आव कैद दा ईरोन, ३:१; ४:१ अदकि ६:२० याग तकिकिस इफसिगोळ मंडली इक सकिली इफसियों होगोन आग पौलुस ईद चट्ठी आऊन कय दा कळुदुन ६:२१-२२

इफसियों ऊंद हापाळ धोळ्द शयर ईरोद, आ समय एशिया माइनर प्रांत इन अद राजधानी ईरोद. शयर दा अर्तमसि हेसुर ईनव ग्रीक द्याव उन ऊंद धोळ्द मंदरि ईरोद यदुर कारण देल इफसियों अक हापाळ प्रसद्धी सकित, प्रेरतिगोळ १९:२३-३१ ईद इफसिगोळ मंडली सुरूवात वळ्लीद आत लेकीन बाददा कमजोर भी काळसत प्रकाशतिवाक्य २:१-७ परमेश्वर तान लॉकुरी नविळुस्कु यीशु मसीह अन द्वारा ह्यांग आंदुरव पापगोळ से छुटकारा कोट्टुन ईद मात पौलुस उन चट्ठी इन पयला भाग स्पष्ट माळतद, आव मंडली इन तुलना आ शरीर

इन सांगुळ माळतान क्कियार्द मस्त्क मसीह अच हुन अदकि आव अद क्वाना अन्द कल्ल आ इमारत देल यार्द क्वाना अन्द कल्ल मसीह हुन कतिाब इन दुसरा भाग दा मसीह जीवन ह्यांग जीऊस पायजे ईदुर बारा दा हेळतान.

रूप रेखा

१. पौलुस खुद इन परचिय कोटकु इफसियिों अक शुभेच्छा कोळतान. अध्याय १:१-२
२. बाददा आ मंडली इन मसीह अन सांगुळ ह्यांग रशिता ईर पायजे १:३-३:२१
३. बाददा पौलुस मसीह जीवन ह्यांग जीऊस पायजे ईदुर बारा दा हेळतान ४:१-६:२०
४. पौलुस आखरी शब्द दा चट्ठी लखिसकु खतम माळतान ६:२१-२४

1 \*नान पौलुस उन दी टु जो परमेश्वर उन इच्छा देल यीशु मसीह अन प्रेरति आन,  
आ पवतिर अदकि मसीह यीशु दा वशिवासी लॉकुर्द हेसुर जो इफसिस दा आद:

2 नाम्द आप्प परमेश्वर अदकि प्रभु यीशु मसीह अन्द दी टु नीमी अनुग्रह अदकि शांती सकितेला ईरूल.

मसीह दा आत्मकि आशीषगोळ

3 नाम्द प्रभु यीशु मसीह अन्द परमेश्वर अदकि आप्प उन धन्यवाद आगुल क्कि आव नामी मसीह दा स्वरगीय जागागोळ दा सब प्रकार इन आत्मकि आशीष कोट्टुन. 4 ह्यांग आव नामी दुनिया अन उत्पत्ति टु पयला अदुरदा नीवळुस कौडान

क्कि नाव आऊन हात्ती प्यार दा पवतिर अदकि नरिदोष आगुल. 5 अदकि तान इच्छा अन्द भला अभपिराय इन अनुसार नामी तान साटी पयला टु ठहरूसदुन क्कियीशु मसीह अन्द द्वारा

\* 1:1 १:१ प्रेरतिगोळ १८:१९-२१; १९:१

नाव आऊन गोद पार आगुल, <sup>6</sup> क्कि आऊन आ अनुग्रह अनन्द महमिा अनन्द स्तुति आगुल, यारी आव नामी आ प्रयि दा सैत-मैत कोट्टुन. <sup>7</sup> ✧नामी अदुर्दा आऊन रक्ता अन द्वाारा छुटकारा, मतलब अपराधगोळ्द माफी, आऊन आ अनुग्रह अनन्द धन इन अनुसार सकियाद, <sup>8</sup> यारी आव पुरा ग्यान अदकि समझ सहति

नाम मा बहुतायत देल माळदुन. <sup>9</sup> यतकी आव तान इच्छा अनन्द भेद आ भला अभिप्राय इन अनुसार नामी हेळदुन, यारी आव खुद तान दा ठान्स कौडीदुन <sup>10</sup> क्कि समयगोळ्द पुरा आगोद हगि प्रबन्ध आगुल क्कि जो येनारा स्वर्ग दा आद अदकि जो येनारा पृथ्वी मा आद, सप्पा येनारा अद मसीह दा जमा माळुल.

<sup>11</sup> अदुर्दा यदुर्दा नाव भी आऊन मनसा देल जो तान इच्छा अनन्द मत इन अनुसार सप्पा येनारा माळतान, पयला टु ठहूसकु आगकु मीरास बनसुल <sup>12</sup> क्कि नाव, यार पयला टु मसीह मा आशा ईटीदेव, आऊन महमिा अनन्द स्तुति इन कारण आगुल.

<sup>13</sup> अदकि अदुर्दा नीम मा भी, याग नीव सच्चाई इन वचन केळदीर जो नीमद उद्धार इन खुशखबरी आद अदकि यदुर मा नीव वश्वास माळदीर, वादा माळकु आत पवतिर आत्मा अनन्द छाप हत्त. <sup>14</sup> परमेश्वर उन साटी पैस्या देल कौडकु आग्यार आंदुर्द छुटकारा अनन्द साटी नाम्द मीरास इन बयाना हुन, क्कि आऊन महमिा अनन्द स्तुति आगुल.

### पौलुस उन प्रार्थना

<sup>15</sup> ई कारण, ना भी आ वश्वास इन बातणी केळकु जो नीम लॉकुर दा प्रभु यीशु मा आन अदकि सप्पा पवतिर लॉकुर मा प्यार प्रगट आद, <sup>16</sup> नीम साटी धन्यवाद माळोद बळिलीन, अदकि तान प्रार्थनागोळ दा नीमी याद माळतेला ईरतीन <sup>17</sup> क्कि नाम्द प्रभु यीशु मसीह अनन्द परमेश्वर जो महमिा अनन्द आप्प

हुन, नीमी तान पहचान दा ग्यान अदकि प्रकाश इन आत्मा कोळुल, <sup>18</sup> अदकि नीमूद मन इन कण्णगोळ ज्योतरिमय आगुल की नीव जान्स कोमी की आऊन बुलाहट इन आशा येन आद, अदकि पवतिर लॉकुर दा आऊन मीरास इन महमिा अन्द धन हयांग आद, <sup>19</sup> अदकि आऊन सामर्थ्य नाम दा जो वशिवास माळतार, याट महान आद, आऊन शक्ति इन प्रभाव इन आ कार्य अन्द अनुसार <sup>20</sup> जो आव मसीह दा माळदुन की आऊक सोततुर दा टु जतिता माळकु स्वरगीय जागागोळ दा तान ऊम्मा कय दी कुरसदुन <sup>21</sup> ताकी सब प्रकार इन प्रधानता, अदकि अधिकार, अदकि सामर्थ्य, अदकि प्रभुता अन्द, अदकि हर ऊंद हेसुर इन म्याकुच, जो ना सरिफ ई दुनया दा पर बरावाळा दुनया दा भी ताकोमकु आदीन, कुरसदुन; <sup>22</sup> \*अदकि सप्पा येनारा आऊन कालगोळ ल्यालमा माळ बुट्टुन; अदकि आऊक सब वस्तुगोळ मा शरेश्ट ठहूसकु मंडली इक कोट बुट्टुन, <sup>23</sup> ईद आऊन मय हुन, अदकि आऊन परपिर्णता आद जो सब दा सब येनारा पुरा माळतान.

## 2

### मृत्यु टु जीवन दी

<sup>1</sup> \*आव नीमी भी जतिता माळदुन, जो तान अपराधगोळ अदकि पापगोळद कारण सोतकु ईरोर <sup>2</sup> यदुर मा नीव पयला ई दुनया अन रीति मा, अदकि आकाश इन अधिकार इन शासक मतलब आ आत्मा अन्द अनुसार नळीर, जो ईग भी आग्या ईला मान्सावाळेर्द कार्य माळतान. <sup>3</sup> इंदुर दा नाव भी सप्पा अच मुंदुर पयला तान मय इन लालसागोळ दा दनि बतुसेव, अदकि मय अदकि मन इन इच्छागोळी पुरा माळेव, अदकि अन्य लॉकुर घाई स्वभाव देल सटिट इन औलाद ईरेव.

\* 1:22 १:२२ कुलुससगिळ १:१८

\* 2:1 २:१ कुलुससगिळ २:१३

4 लेकीन परमेश्वर जो दया अन्द धनी आन, तान आ धोळ प्यार इन कारण यार देल आव नाम से प्यार माळदुन, 5 याग नाव अपराधगोळ्द कारण सोतकु ईरेव रा नामी मसीह अन्द सांगुळ जत्तिता माळदुन अनुग्रह देल अच नीम्द उद्धार आत, 6 अदकि मसीह यीशु दा आऊन सांगुळ नेगदुन, अदकि स्वर्गीय जागा दा आऊन सांगुळ कुरसदुन 7 कर् आव तान आ कृपा देल जो मसीह यीशु दा नाम मा आद, बरावाळा समय इन दुनयिा दा तान अनुग्रह अन्द असीम धन तोरसदुन. 8 यतकी वश्वास इन भेट इन द्वारा अनुग्रह देल अच नीम्द उद्धार आत, अदकि ईद नीम्द दी टु ईला, बलकी परमेश्वर उन दान हुन, 9 अदकि ना कर्मगोळ्द कारण, हगि आगबाळुल कर् यिावारा घमण्ड माळुल. 10 यतकी आव नामी माळ्यान, अदकि मसीह यीशु दा आ वळ्लीद क्वालसागोळ्द साटी माळकु आगीर यारी परमेश्वर पयला टु नामी माळोर साटी तयार माळदुन.

### मसीह दा ऊंद

11 ई कारण याद माळी कर् नीव जो शारीरक रीतदिल गैरयहूदी आईर अदकि जो लॉकुर मय दा कय इन माळकु खतना देल खतनावाळेर कहलुस्तार, आंदुर नीम इक खतनारहति अनतार, 12 नीव लॉकुर आ समय मसीह टु अलग, अदकि इस्त्राएल इन प्रजा अन्द पद देल अलग माळकु आदीर, अदकि वादा अन्द वाचागोळ्द भागी ईला ईरोर, अदकि आशाहीन अदकि दुनयिा दा मय रहति ईरोर. 13 लेकीन ईग मसीह यीशु दा नीव जो पयला दुर ईरीर, मसीह अन्द रक्ता अन द्वारा हात्ती आगेगीर. 14 यतकी आवा नाम्द मेल हुन जो येदुदु मुंदरी ऊंद माळ कौडुन अदकि अलग माळावाळा दविर इक जो बीच दा ईरोद केडु बुट्टुन, 15 ✨अदकि तान मय दा दुश्मनी मतलब अद व्यवस्था यदुरद आग्यागोळ वधीगोळ्द रीतमा ईरव, मटिकुस बुट्टुन कर् यिेदुदु

देल तान दा ऊंद व्हाशोद मंळसा पैदा माळकु मेल माळसुस बुळुल, <sup>16</sup> अदकि कूस मा दुश्मनी इक नाश माळकु इदुर दवारा येदुदु मुंदरी ऊंद मय माळकु परमेश्वर देल भेंट माळसुस्यान. <sup>17</sup> आव बंदकु नीमी जो दुर ईरीर अदकि आंदरी जो हात्ती ईरोर, येदुदु मुंदरी मेल मलाप इन खुशखबरी केळसदुन. <sup>18</sup> यतकी आऊन दवारा नाव येदुदु मुंदुरद ऊंद आत्मा दा आप्प उन हात्ती प्रवेश आगतद.

<sup>19</sup> इदुरसाटी नीव ईग परदेशी अदकि मुसाफिर ईतीदील, लेकीन पवतिर लॉकुरद संगी स्वदेशी अदकि परमेश्वर उन घराना दोर आगेदीर. <sup>20</sup> अदकि प्रेरतिगोळ अदकि भवषियवक्तागोळ्द पायवा मा, यार्द क्वाना अन्द कल्ल मसीह यीशु खुद अच आन, माळकु आगीर. <sup>21</sup> यदुरदा पुरा रचना ऊंद सांगुळ मलिसकु प्रभु दा ऊंद पवतिर मंदिर बन्सतेला होगतद, <sup>22</sup> यदुरदा नीव भी आत्मा अन्द दवारा परमेश्वर उन नवासि स्थान आगेर साटी ऊंद सांगुळ माळकु आगतीर.

### 3

गैरयहूदीगोळ दा पौलुस उन स्यावा

<sup>1</sup> ईदा कारण ना पौलुस जो नीव गैरयहूदीगोळ्द साटी मसीह यीशु दा बंदीन. <sup>2</sup> अगर नीव परमेश्वर उन आ अनुग्रह अन्द प्रबन्ध इन समाचार केळीदीर, जो नीम्द साटी नानी कोटक आग्याद, <sup>3</sup> मतलब ईद कि अद भेद नान मा प्रकाशन इन दवारा प्रगट आत, ह्यांग ना पयला अच थ्वाळासा दा लखिसदीन, <sup>4</sup> यारी नीव वाचुसकु जानस सकतीर कि ना मसीह अन्द अद भेद यल ताका सम्सतीन. <sup>5</sup> जो अन्य समयगोळ दा मंळसागोळ्द औलादगोळ इक हगि ईला हेळकु आगीत, ह्यांग कि आत्मा अन्द दवारा ईग आऊन पवतिर प्रेरतिगोळ अदकि

☆ 2:16 २:१६ कुलुससिगिळ १:२०

☆ 3:4 ३:४ कुलुससिगिळ १:२६,२७

भवषियवक्तागोळ मा प्रगट माळकु आग्याद. <sup>6</sup>मतलब ईद कि मसीह यीशु दा खुशखबरी इन द्वारा गैरयहूदी लॉकुर मीरास दा हसिसेदार, अदकि ऊंद अच मय इन अदकि वादा अन्द भागी आर.

<sup>7</sup> ना परमेश्वर उन अनुग्रह अन्द आ दान इन अनुसार, जो आऊन सामर्थ्य अन्द प्रभाव इन अनुसार नानी कोटकु आग्याद, आ खुशखबरी इन सेवक बन्सदीन, <sup>8</sup> नान मा जो सप्पा पवत्रि लॉकुर दा टु स्याणेर दा टु भी स्याणेव आईन, ईद अनुग्रह आत कि ना गैरयहूदीगोळ इक मसीह अन्द अगम्य धन इन खुशखबरी केळसाईन, <sup>9</sup> अदकि सब मा ईद मात प्रकाशति माळुल कि आ भेद इन प्रबन्ध येन आद, जो सप्पा मुंदुर सृजनहार परमेश्वर दा सुरूवात टु गुप्त ईरोद. <sup>10</sup> ताकी ईग मंडली इन द्वारा, परमेश्वर उन अलग अलग प्रकार इन ग्यान आ प्रधानगोळी अदकि अधिकारीगोळ मा जो स्वर्गीय जागा दा आर, प्रगट माळकु आगुल. <sup>11</sup> आ अनन्त मंळसा अन्द अनुसार जो आव नाम प्रभु मसीह यीशु दा माळीदुन. <sup>12</sup> यदुर दा नामी आऊन मा वशिवास माळदुर देल साहस अदकि भरोसा अन्द सांगुळ परमेश्वर उन हात्ती बरोद अधिकार आद. <sup>13</sup> इदुरसाटी ना वनिती माळतीन कि जो क्लेश नीम साटी नानी आगेत्याद, अदुर कारण साहस बळिबाळी, यतकी अदुर दा नीमद महमा आद.

### मसीह अन्द प्यार

<sup>14</sup> ना ईदा कारण आ पृथ्वी मा आपप उन मुंद ट्वांगरा टेकसतीन, <sup>15</sup> यदुर देल स्वर्ग अदकि पृथ्वी मा, हर ऊंद घराना अन्द हेसुर ईटकु आगतद, <sup>16</sup> कि आव तान महमा अन्द धन इन अनुसार नीमी ईद दान कोळुल कि नीव आऊन आत्मा देल तान बुळ्क इन मंळसातत्व दा सामर्थ्य हासलि माळकु बलवन्त आगतेला होगी; <sup>17</sup> अदकि वशिवास इन द्वारा मसीह नीमद दलि दा कुरूल कि नीव प्यार दा जळ हुळकु अदकि पायवा हाक्कु,

18 सप्पा पवतिर लॉकुरद सांगुळ भला-भाति समसोद शक्ती सकिलु कि आऊन चौळाई, अदकि लंबाई, अदकि ऊँचाई, अदकि गहराई याट आद, 19 अदकि मसीह अनूद आ प्यार इक जान्स सकी जो ग्यान देल अनजान आर कि नीव परमेश्वर उन पुरा भरपुरी ताका परपिर्ण आगेगी.

20 ईग जो हगि सामर्थी आन कि नामद वनिती अदकि समझ देल मातत यक्कुल क्यालसा माळ सकतान, आ सामर्थ्य अनूद अनुसार जो नाम दा कार्य माळतान, 21 मंडली दा अदकि मसीह यीशु दा आऊन महमा पीढी टु पीढी ताका हमेशा हमेशा आगतेला ईरूल. आमीन.

## 4

### मसीह अन मय दा एकता

1 इदुरसाटी ना जो प्रभु दा बंदीन नीम से वनिती माळतीन कि या बुलाहट देल नीव कारूकु आगीदीर, अदुर लायक व्यवहार माळी, 2 \*मतलब पुरा दीनता अदकि नम्रता सहति, अदकि धीरज हुळकु प्यार देल आबुर दाबुरद सहन माळी; 3 अदकि मेल इन बंधन दा आत्मा अनूद एकता ईटोद यत्न माळी. 4 ऊंद अच मय आद अदकि ऊंद अच आत्मा; ह्यांग नीमी जो कारूकु आगीदीर तान कारूकु आगोर देल ऊंद अच आशा आद. 5 ऊंद अच प्रभु आन, ऊंद अच वश्वास ऊंद अच बपतस्मा, 6 अदकि सब मुंदुरव ऊंद अच परमेश्वर अदकि आप्प आन, जो सप्पा मुंदुर म्याकुच अदकि सप्पा मुंदुर बीच दा अदकि सब मुंदुर दा आन.

7 लेकीन नाम दा टु हर ऊंद मळसा अक मसीह अनूद दान इन परमाण इन अनुसार अनुग्रह सकियाद. 8 इदुरसाटी आव अनतानु:

“आव ऊँचाई मा येरदुन

अदकि बंदीगोळ इक कटकु ओतुन,



अदकि मंळसागोळ इक दान कोट्टुन.”

9 आऊन येरदुर देल, अदकि येन सकितद सर्फि ईद कि अद पृथ्वी इन ल्यालमा जागागोळ्द दा ईळसी भी दुन. 10 अदकि जो ईळदुन ईव आवा हुन जो पुरा आकाश टु म्याकुच येरे भी दुन कि सब येनारा परपिर्ण माळुल. 11 आव थ्वाळासा लॉकुरी प्रेरति नयिक्त माळकु, अदकि थ्वाळासा लॉकुरी भवषियवक्ता नयिक्त माळकु, अदकि थ्वाळासा लॉकुरी खुशखबरी केळावाळेर नयिक्त माळकु, अदकि थ्वाळासा लॉकुरी रखवाला अदकि उपदेशक नयिक्त माळकु कोट बुट्टुन, 12 यदुर देल पवतिर लॉकुर सदिध आगोर्गुल अदकि स्यावा अनूद क्याल्सा माळकु आगुल अदकि मसीह अनूद मय इक उन्नती सकिकुल, 13 यागासताका कि नाव सब इन सब वशिवास अदकि परमेश्वर उन पार उन पहचान दा ऊंद आगबाळुल, अदकि ऊंद सदिध मंळसा आगबाळुल अदकि मसीह अनूद पुरा डील-डौल ताका ना वाळुसुल. 14 ताकी नाव मुंदु टु चकिोर ईरतीदील जो मंळसागोळ्द ठग-वदिद्या अदकि चतुराई देल, आंदुर भ्रम इन युक्तगिळ्द अदकि उपदेश इन हर ऊंद ध्वाका देल उछलसकु अदकि ईल अल तरिगुसकु आगताव. 15 बल्की प्यार दा सच्चाई देल माताळतेला सब मातगोळ दा अदुर्दा जो ताल्ला आद, मतलब मसीह दा वाळुसतेला होगुल, 16 यदुर देल पुरा मय, हर ऊंद जोळ इन सहायता देल ऊंद सांगुळ मलिसकु अदकि ऊंद सामर्थ्य सांगुळ गठुसकु, आ प्रभाव उन अनुसार जो हर ऊंद अंग इन ठीक-ठीक कार्य माळोर द्वारा आऊन दा आगतद, तान तान इक वाळुसतद कि आव प्यार दा उन्नती माळतेला होगुल.

मसीह दा व्हाशोद जीवन

17 इदुरसाटी ना ईद अनतीन अदकि प्रभु दा आग्रह माळतीन कि ह्यांग गैरयहूदी लॉकुर तान मन इन अनर्थ रीति मा नळुतार,

नीव ईंगी टु बाक हगि व्यवहार माळबाळोतीर. 18 यतकी आंदुर बुद्धी भ्रष्ट आगोग्याद, अदकि आ अग्यानता अन्द कारण जो आंदुर दा आद अदकि आंदुर मन इन कठोरता अन्द कारण आंदुर परमेश्वर उन जीवन टु अलग माळकु आदुर; 19 अदकि आंदुर सुन्न आगकु लुचपन दा हतेदुर कऱि सब प्रकार इन खराब क्वालसा लालसा देल माळुल.

20 पर नीव मसीह अन्द हगि शक्विषा ताकोडीदील. 21 बल्की नीव खराखुरा आऊंदा केळदीर अदकि, ह्यांग यीशु दा सच्चाई आद, अदुर दा कलसकु भी आग्यार 22 ✨कऱि नीव पछिला चाल चलन इक हाळोद मंळसातत्व अक जो भरमुसावळत अभलिषागोळद अनुसार भ्रष्ट आगोगतद, ईळु बुळी 23 अदकि तान मन इन आत्मकि स्वभाव दा व्हाशोद बनसतेला होगी, 24 ✨अदकि व्हाशोद मंळसातत्व अक हाक्क कोमी जो परमेश्वर उन अनुरूप सच्चाई इन न्यायीपन अदकि पवतिरता दा सजुसकु आग्याद.

25 ई कारण ख्वाटा माताळोद बटिकु हर ऊंद मंळसा तान मानना हातळोर से सही माताळुल, यतकी नाव आपस दा आबुर दाबुर अंग हुयेव. 26 सटिट रा माळी, पर पाप माळबाळी; सुर्य मुळका ताका नीम्द गुस्सा ईरबाळुल, 27 अदकि ना शैतान उक मवका कोळी. 28 काळताना माळावाळा बाक काळताना माळबाळुल, बल्की वळ्ळीद क्वालसा माळोर साटी तान कयगोळ देल मेहनत माळुल, इदुरसाटी कऱि यारी प्रयोजन आद आऊक कोळली आऊन हात्ती येनारा ईरूल. 29 यातोदु सही मात नीम्द बाय देल होळबाळुल, पर जरवत इन अनुसार अदा होळुल जो उन्नती इन साटी वळ्ळीद ईरूल, ताकी आऊन से केळावाळेर मा अनुग्रह ईरूल. 30 परमेश्वर उन पवतिर आत्मा अक दुख माळबाळी, यदुर देल नीम मा छुटकारा अन्द दनि इन साटी छाप

✨ 4:22 ४:२२ कुलुससगिोळ ३:९

✨ 4:24 ४:२४ कुलुससगिोळ ३:१०

कोटकु आग्याद. 31 सब प्रकार इन कळवाहट, अदकि प्रकोप अदकि सटिट, अदकि कलह, अदकि अपमान, सप्पा बैरभाव समेत नीम से दुर माळकु आगुल. 32 ✨आबुर दाबुर मा कृपा माळी अदकि मेहरबान आगी, अदकि ह्यांग परमेश्वर मसीह दा नीमद अपराध माफ माळदुन, हांग अच नीव भी आबुर दाबुरद अपराध माफ माळी.

## 5

### ऊजूळ दा ईरोद

1 इदुरसाटी प्रयि चकिरगोळ घाई परमेश्वर उन अनुकरण माळी, 2 अदकि प्यार दा नळी ह्यांग मसीह भी नीम से प्यार माळदुन, अदकि नाम साटी तान तान इक सुखदायक सुगन्ध इन साटी परमेश्वर उन मुंद भेंट माळकु बलदान माळ बुट्टुर.

3 ह्यांग पवतिर लोकरुद लायक आद. हांग नीम दा व्यभचार अदकि यातोदु प्रकार इन अशुध्द क्याल्सा या लोभ इन मात भी आगबाळुल; 4 अदकि ना नरिलज्जता, ना मूढता अनद मातचीत माळदेव, ना मज्याक माळदेव; यतकी ईव मातगोळ शोभा कोळालव, बल्की धन्यवाद अच केळकु आगुल. 5 यतकी नीव ईद जान्सतीर क्कियावारा व्यभचारी, या अशुध्द जन, या लोभी मंळसा अनद, जो मूर्ति इन पुजा माळावाळा अन बराबर आन, मसीह अदकि परमेश्वर उन राज्य दा मीरास ईल्लच.

6 यावारा नीमी व्यर्थ मातगोळ देल ध्वाका कोळबाळुल, यतकी ईवा क्याल्सागोळद कारण परमेश्वर उन सटिट आग्या ईला मानसावाळेरे मा भळकुसतद. 7 इदुरसाटी नीव आंदुर सहभागी ईरबाळी. 8 यतकी नीव रा पयला अंधकार ईरीर लेकीन ईग प्रभु दा ज्योति आईर, इदुरसाटी ज्योति इन औलाद इन घाई नळी 9 यतकी ज्योति इन फल सब प्रकार इन भलाई, अदकि न्यायीपन, अदकि सच्चाई आद, 10 अदकि ईद

परखुसी कऱि प्रभु उक येन भाऊसतद. 11 अंधकार इन नषिफल क्याल्सागोळ दा सहभागी ईरबाळी, बल्की अदुर मा उलाहना कोळी. 12 यतकी आंदुर गुप्त क्याल्सागोळ्द चर्चा भी शरम इन मात आद. 13 पर यास क्याल्सागोळ मा उलाहना कोटकु आगतद अव सप्पा ज्योर्तिटु प्रगट आगतद, यतकी जो सप्पा येनारा अक प्रगट माळतद अद ज्योर्ति हुन. 14 ई कारण आव अनतान,  
“हे मगिावाळा,

जाग्स अदकि मुर्दागोळ दा टु जतिता येळ;  
रा मसीह अन्द ज्योर्ति नीन मा चमकुसीत.”

15 इदुरसाटी ध्यान देल नोळी, कऱि ह्यांग चाल नळुतीरः नरिबुद्धीगोळ्द घाई ईला पर बुद्धमिानगोळ्द घाई नळी. 16 \*मवका अक बार्र सम्सी, यतकी दनि बुरा आव. 17 ई कारण नरिबुद्धी ईरबाळी, पर ध्यान देल सम्सी कऱि प्रभु उन इच्छा येन आद.

18 अंगुर इन रास्सा टु मतवाला बन्सबाळी, यतकी इदुर देल लुचपन आगतद, पर आत्मा देल परपुर्ण आगतेला होगी, 19 \*अदकि आपस दा भजन अदकि स्तुर्ति हाळ अदकि आत्मकि हाळगोळ हाळतोगी, अदकि तान तान मन दा प्रभु उन मुंद हाळतेला अदकि कीर्तन माळतेला ईरी. 20 अदकि हमेशा सब मातगोळ्द साटी नाम्द प्रभु यीशु मसीह अन्द हेसुर देल परमेश्वर आप्प उन धन्यवाद माळतेला ईरी.

### गांड्ड अदकि हगिस्

21 मसीह अन्द अंज्क देल आबुर दाबुर्द हात्ती ईरी.

22 \*हे हगिसुरा, तान तान गांड्ड उन हगि हात्ती ईरी जसा प्रभु उन. 23 यतकी गांड्ड हगिस् उन ताल्ला हुन ह्यांग कऱि मसीह मंडली इन ताल्ला आन अदकि खुद अच मय इन

☆ 5:16 ५:१६ कुलुस्सगिळ ४:५ ☆ 5:19 ५:१९ कुलुस्सगिळ ३:१६,१७

☆ 5:22 ५:२२ कुलुस्सगिळ ३:१८; १ पतरस ३:१

उद्धारकर्ता आन. 24 पर ह्यांग मंडली मसीह अनंद हात्ती आद, हांग अच हगिसुर भी हर मात दा तान तान गांड्ड उन हात्ती ईरूल.

25 ✨हे गांड्डुरा, तान तान हगिसुर से प्यार ईटी ह्यांग मसीह भी मंडली से प्यार माळकु तान तान इक अदुर साटी कोट बुट्टुन 26 क्कि आऊक वचन इन द्वारा नीर इन मयतोळदुर देल शुद्ध माळकु पवतिर माळी, 27 अदकि आऊक ऊंद हगि तेजस्वी मंडली माळकु तान हात्ती नदिरसुल, यदुर दा ना कलंक, ना झुर्री, ना यातोदारा अदकि हगि वस्तु ईरूल बल्की पवतिर अदकि नरिदोष ईरूल. 28 ईदा प्रकार उचति आद क्कि गांड्ड तान तान हगिसुर से तान मय इन घाई प्यार ईटली पायजे. जो तान हगिस उन से प्यार ईटतान, आव तान तान से प्यार ईटतान. 29 यतकी याऊ यागलु तान मय देल दुश्मनी ईटीदलि बल्की अदुरद पालन-पोषण माळतान, जसा मसीह भी मंडली इन सांगुळ माळतान. 30 इदुरसाटी क्कि नाव आऊन मय इन अंग हुयेव. 31 “ई कारण मळसा तान मोय-आप्प उक बटिकु तान हगिस उन सांगुळ ईत्तान, अदकि आंदुर येदुदु ऊंद तन आदार.” 32 ईद भेद रा धोळ आद, पर ना ईल मसीह अदकि मंडली इन बारा दा अनतीन. 33 पर नीम दा टु हर ऊंद तान हगिस उन से तान घाई प्यार ईटुल, अदकि हगिस भी तान गांड्ड उन आदर माळुल.

## 6

### मोय-आप्प अदकि चकिोर

1 ✨हे चकिोरगोळा, प्रभु दा तान मोय-आप्प उन आग्याकारी बनसी, यतकी ईद उचति आद. 2 “तान मोय अदकि आप्प उन आदर माळ ईद पयला आग्या हुन यदुर सांगुळ वादा भी आद. 3 क्कि अपमान भला आगुल, अदकि नी पृथ्वी मा हापाळ

दनि ताका जत्तिता ईर.” 4 ✨हे चकीरवाळेरा, तान चकीर इक गुस्सा तरगोळबाळी लेकीन प्रभु उन शक्षिा अदकि चेतावनी कोळतेला आंदुरद पालन-पोषण माळी.

### स्वामी अदकि दास

5 ✨हे दासगोळा, जो लॉकुर ई दुनया दा नीम स्वामी आर, तान मन इंद सही देल अंजुक अदकि नळगतेला, ह्यांग मसीह अनूद हांगा आंदुरद भी आग्या मान्सी. 6 मंळसागोळी खुश माळावाळेरा घाई तोरसोर साटी स्यावा माळबाळी, लेकीन मसीह अनूद दासगोळ घाई अंतर आत्मा देल परमेश्वर उन इच्छा मा नळी, 7 अदकि आ स्यावा अक मंळसागोळूद ईला लेकीन प्रभु उन स्यावा जान्सकु खरा मन देल माळी. 8 यतकी नीव जान्सतीर की हर मंळसा ह्यांगारा वळ्ळीद क्याल्सा माळ्यान, या रा दास ईरूल या रा स्वतंत्र, प्रभु से हांगा हासलि माळ्यान. 9 ✨हे स्वामीगोळा, नीव भी धमकीगोळ कोळव बटिकु आंदुर सांगुळ हांग अच व्यवहार माळी; यतकी नीव जान्सतीर की आंदुर अदकि नीम येदुदु मुंदुरव स्वामी स्वरग दा आन, अदकि आव यारदु पक्षपात माळालुन.

### आत्मकि लळाई इन औजार

10 इदुरसाटी प्रभु दा अदकि आऊन शक्ति इन प्रभाव दा ताकतवर बनसी. 11 परमेश्वर उन सप्पा हथयार हाक्क बुळी कनीव शैतान उन युक्तगोळ मुंद नदुरकु ईर सकीर. 12 यतकी नाम्द ईद मल्लयुद्ध रक्ता अदकि मास देल ईला लेकीन प्रधानगोळ देल, अदकि अधिकारीगोळ देल, अदकि ई दुनया अन अंधकार इन शासकगोळ देल अदकि आ दुष्टता अनूद आत्मकि सेनागोळ देल आद जो आकाश दा आव. 13 इदुरसाटी

✨ 6:4 ६:४ कुलुससगिळ ३:२१ ✨ 6:5 ६:५ कुलुससगिळ ३:२२-२५ ✨ 6:9 ६:९ कुलुससगिळ ४:१; कुलुससगिळ ३:२५

परमेश्वर उन पुरा हथयार कट कोमी कनिव बुरा दनि दा सामना माळ सकी, अदकि सप्पा येनारा पुरा माळकु संची ईर सकी.

14 इदुरसाटी सच्चाई देल तान नेळु कसुसकु, अदकि न्यायीपन इन कवच हाक्कु, 15 अदकि कालगोळ दा मेल इन खुशखबरी इन तयारी इन जुता हाक्कु; 16 अदकि ई सब मुंदुर सांगुळ वशिवास इन ढाल हुडुकु स्थरि ईरी यदुर देल नीव आ दुष्ट इन सब होततेला तीरगोळ इक नुनाक सकी. 17 अदकि उद्धार इन टोप, अदकि आत्मा अनंद तलवार, जो परमेश्वर उन वचन हुन, ग्रहण माळकोमी. 18 हर समय अदकि हर प्रकार देल आत्मा दा प्रार्थना, अदकि वनिती माळतेला ईरी, अदकि इदुरसाटी जागसतेला ईरी कसि सब पवतिर लांकुर्द साटी लगातार वनिती माळतेला ईरी, 19 अदकि नान साटी भी कनि नानी माताळोद समय हगि प्रबल वचन कोटकु आगुल कनि साहस इन सांगुळ खुशखबरी इन भेद खोलसोद कार्य माळ सकाईन, 20 ई खुशखबरी इन खातरि ना शंकली देल जकळुसकु राजस्वर्गदूत हुईन; हालाकाईग ना जयल दा आईन. प्रार्थना माळी कनि ना खुशखबरी इन बारा दा माताळली साहसी आग सकतीन ईद जरूरी आद जसा कनि ना आईन.

### आखरी अभिवादन

21 ✨तुखकिस, जो प्रियि वार्ट अदकि प्रभु दा वशिवासयोग्य सेवक आन, नीमी सब मातगोळ हेळ्यान कनि नीव भी नान दशा जान्सी कनि ना ह्यांग ईरतीन. 22 आऊक ना नीमद हात्ती इदुरसाटी कळुदीन कनि नीव नाम्द दशा अक जान्सी, अदकि आव नीमद मनगोळ इक शांती कोळुल.

23 परमेश्वर आप्प अदकि प्रभु यीशु मसीह अनंद दी टु वार्टुरी शांती अदकि वशिवास सहति प्यार सकिल. 24 जो नाम्द

✨ 6:21 ६:२१ प्रेरतिगोळ २०:४; २ तीमुथयिस ४:१२ ✨ 6:21 ६:२१ कुलुससगिळ ४:७,८

प्रभु यीशु मसीह टु खरा प्यार ईटतार, आ सब मा अनुग्रह  
आगतेला ईरूल.



परमेश्वर उन खरा वचन  
**The Holy Bible in the Holiya language of India:** परमेश्वर  
उन खरा वचन

copyright © 2020 The Word for the World International

Language: Gohllaru (Holiya)

Contributor: The Word for the World International

परमेश्वर उन खरा वचन  
व्हाशोद नयिम, 2020

The New Testament in Holiya Language

The Word for the World International

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-08

---

PDF generated using Haiola and XeLaTeX on 21 Feb 2024 from source files dated 9 Apr 2023

3943f9d0-5b35-54ad-8e8f-1b7bf74924c6